

Isumaliutissiissut

Danmarkimi kalaallit, Kalaallit Nunaanni nappaataasa peqqissarneqarsinnaannginnerat peqqutigalugu Brønshøjimi Rigshospitalimilu peqqissarlutik uninngasut kalaaliminernik nerisaqartarnissaat qulakkeerniarlugu ukiumut 200.000 kr-ninik nunatta karsianiit aningaasnik immikkoortitsisalnissaq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut
(Inatsisartuni ilaasortaq, Doris Jakobsen Siumut)

pillugu

Ilaqutariinnermut Peqqissutsimullu ataatsimiititaliap isumaliutissiissutaa

Aalajangiiffigisassatut siunnersuutip aappassaaneerneqarnerani saqqummiunneqartoq

Piffissami kingullermi ataatsimiititaliaq makkuninnga ilaasortaqqarpoq:

Inatsisartunut ilaasortaq, Olga P. Berthelsen, Inuit Ataqatigiit

Inatsisartunut ilaasortaq, Debora Kleist, Inuit Ataqatigiit

Inatsisartunut ilaasortaq, Isak Hammond, Inuit Ataqatigiit

Inatsisartunut ilaasortaq, Astrid Fleischer Rex, Demokraatit

Inatsisartunut ilaasortaq, Knud Kristiansen, Atassut

Inatsisartunut ilaasortaq, Malik Berthelsen, Siumut

Inatsisartunut ilaasortaq, Ruth Heilmann, Siumut

Siunnersuut ulloq 3. marts 2011 siullermeerneqareermat Peqqissutsimut ataatsimiititaliamut sukumiinerusumik suliassanngortinneqarpoq.

Siunnersuutip imaa aamma siunertaa

Siunnersuuteqartoq isumaqqarpoq kalaallit uninngasut kalaaliminernik nerisaqartitaanerat pingaaruteqarluinnartuusoq. Peqqissartut Kalaallit Nunaanneersut napparsimallutik Danmarkimi uninngasut kalaaliminernik ajornannginnerusumik pisinnaalernissaasa isumannaarneqarnissaa siunnersuuteqartup siunnersuutimigut qulakkeerniarpaa. Ukiumoortumik aningaasaliissutit naammangimmata uninngasut qaammammut marlussoriarlutik taamaallaat kalaaliminernik sassaalliivigineqartarput, siunnersuuteqartullu uninngasunik oqaloqateqartarsimanermini tamanna naammassorinngilaa. Taarsiullugit qallunaat nerisassaat kalaaliminerpalussarlugit sassaalliutigineqartarput.

Brønshøjimi Rigshospitalimilu uninngasunut kalaaliminernik pisiniartarnissamut ukiumut 200.000 kr.-nik Nunatta karsianit aningaasaliisoqartassasoq siunnersuuteqartup siunnersuutigaa. Tamanna uninngasut kalaaliminernik amigaateqartarnerannik pissuteqarpoq.

Inatsisartuni siunnersuutip siullermeerneqarnera

Naalakkersuisut

Naalakkersuisut isumaqarput Brønshøjimi Kalaallit Peqqissartut Angerlarsimaffianni kalaaliminernik atuineq annertusartariaqartoq. Taamaattumik aningaasatigut atugassarititaasutigut kalaaliminernik annertunerusumik atuisalernissamut periarfissat aammalu pineqartumut aningaasanik amerlanerusunik tunniussaqaarsinnaaneq Naalakkersuisunit misissorniarneqarpoq.

Rigshospitalimi kalaallinut uninngasunut atatillugu maanna nerisatigut neqeroorutaasartut Naalakkersuisut nalilersuiffigalugit aallartinniarnarpaat. Naliliinermi inerniliussat apequtaatillugit kalaallinut uninngasunut kalaaliminertortitsisalernissap atuutilernissaanut periarfissamik Naalakkersuisut Rigshospitalimik oqaloqateqalersaarput.

Siunnersuummi siunertat Naalakkersuisut tapersersoraluaraat siunnersuut taama isikkoqartillugu Naalakkersuisut tapersersorsinnaangilaat.

Inuit Ataqtigiit

Inuit Ataqtigiit siunnersuutigineqartoq iluarinarteqaat, siunnersuullu Inatsisartut Peqqissutsimut ataatsimiititaliaani suliareqqitassanngorlugu innersuussutigalugu, Naalakkersuisunit tunuarsimaarfigineqartut isiginiarlugit Ataatsimiititaliap siunnersuummut allannguutissatut siunnersuummik saqqummiussinissaa siunertaralugu.

Siumut

Siumut isumaqataanertik ersarissumik oqaatigaat. Periarfissap Naalakkersuisooqatigiinnit ammaffigineqarnera innersuussutigalugu aalisartut piniartullu tunisaqarnermikkut aningaasanik isertitaqartarnerannut iluaqutaasussaanera qularutiginnigilaat.

Demokraatit

Demokraatit isumaqarput uninngasut katsorsartinnermini Danmarkimiittariaqartut ullut tamaasa kalaaliminertortinneqartassasut. Taamaattumik siunnersuutigineqartut aningaasaliissutissat 200.000 kr.-niit 400.000 kr.-nut qaffanneqarnissaat Demokraatit kissaatigaat.

Atassut

Atassummit kalaallit Danmarkimi uninngasut kalaaliminernik annertunerusumik qulakkeerunneqarnissaat pingaartinneqarpoq. Ataatsimut isigalugu Atassutip siunnersuut tapersersinnaavaa, ataatsimiititaliamilli susassaqtumit sukumiinerusumik nalilerneqassasoq isumaqarfigalugu.

Kattusseqatigiit Partiiat

Kattusseqatigiit Partiiata siunnersuut tunngaviatigut isumaqatigaat, taamaattorli Naalakkersuisut oqaaseqaataat suliniutaallu paasillugit Naalakkersuisut itigartitsinissamik siunnersuutaat taperserpaat. Partiilli arlallit Ataatsimiititaliami oqaluuserineqarnissaanik innersuussinerat aalangiiffigisassatullu siunnersuummut allannguutissatut siunnersuuteqaratarnissaq pissutigalugu Kattusseqatigiit Partiiata siunnersuut Ataatsimiititaliamut suliareqqitassanngortillugu innersuussutigaa.

Siunnersuutip Ataatsimiititaliamit suliarineqarnera

Ataatsimiititaliap nuannaarutigaa siunnersuut Inatsisartuni siullermeerneqarnerani partiinit tamanit tapersersorneqarluni ataatsimiititaliamut eqqartugassanngorlugu ingerlateqqinneqarmat. Kalaallit Danmarkimi uninngasut kalaaliminertortinneqarnissaannut Inatsisartuni ilaasortat annertuumik soqutiginnimmata Ataatsimiititaliap maluginiarpaa. Siunnersuutigineqartup oqaluuserineqarnerani aningaasartaasa 200. 000 kr.-iniit 400. 000 kr.-nut qaffanneqarnissaat oqaaseqartut amerlanerussuteqartut isumaqataaffigalugu oqaatigaat. Oqaluuserineqarportaaq Brønshøjimi Peqqissartut Angerlarsimaffiannut taamaallaat aningaasaliissuteqarnissaq siunniunneqartariaqartoq, Rigshospitalimi uninngasut aamma Brønshøjimi Peqqissartut Angerlarsimaffianni uninngasut immikkut nerisaqartinneqartarmata. Ataatsimiititaliamittaaq isumaqatigineqarpoq Naalakkersuisut Rigshospitalimik piaarnerpaamik oqaloqateqarnissaat, tassani kalaallit uninngasut kalaaliminernik annertunerusumik periarfissaqarnissaasa qulakkeerneqarnissaa siunertarineqarmat.

Naalakkersuisunut apeqqutit

Ataatsimiititaliap aalajangiuppaa siunnersuutip aappassaaneerseqarnissaata UKA 2011-mut kinguartinneqarnissaa Inatsisartut Siulittaasoqarfianut qinnutigineqassasoq. Kinguartitsinissamut tunngavilersuutigineqarpoq Naalakkersuisunut allakkatigut apeqquteqaateqarluni Ataatsimiititaliap paasissutissanik pissarsinissamut periarfissaqarusummat.

Ataatsimiititaliap paaserusutaanut ilaapput kalaaliminernik Danmarkimut eqquassinissamut tunngassuteqartut, tassaasut eqquassinissamut akuersissutinik aamma Kalaallit Nunaanni kalaaliminernik nioqqutissiorfiit arlaannut isumaqatigiissusiornermik Naalakkersuisut qulakkeerinnissimanersut. Naalakkersuisut paasissutissiinerat malillugu Kalaallit Peqqissartut Illuat makkuninnga isumaqatigiissuteqarnikuvoq:

- *neqinik aalisakkanillu tunisassianik suuneri aalajangersimasunik nunatsinnit eqqussuinissamut Danskit Inuussutissanut Aqutisoqarfiannut eqquassinissamut akuersissuteqartoqartoq.*
- *Kvartalikkaartumik aalajangersimasumik pilersorneqarnissamik Arctic Green Food-ilu isumaqatigiissuteqartoqartoq. Isumaqatigiissummi tassani soorunami apeqqutaavoq piffissami pilersuiviusussami tunisassiat suut suliffeqarfimmit toqqorsivimmiittuutigineqarnersut.*

Kalaaliminernik Danmarkimut eqqussinermi maleruagassat atuuttut malinneqarnersut aammalu nioqqutissanik kikkut pisinissamut isumaqatigiissusiorfigineqarneqarsimanerat qularnaarneqarusummat Ataatsimiititaliap qulaani pineqartunut paasisaqarusunnerminut tunngavilersuutigaa.

Immikkoortumi isumaqatigiissutaajumaartussat pillugit suliariumannittussarsiuussinissaq Naalakkersuisut sulissutigisariaqaraat ataatsimiititaliap erseqqissassallugu pissutissaqarsoraa, taamaalilluni kalaaliminernik tunisassiortut amerlanerit Kalaallit Nunaata avataani nakorsiarlutik uninngasunut kalaaliminernik pilersornerannut qulakkeerinneqataasinnaaqullugit. Nioqqutissanut pineqartunut eqqussuinerimi annissuinermilu maleruagassat tunngavigineqartut soorunami naapertorlugit tamanna pissaaq.

Allannguutissatut siunnersuut

Siunnersuutip erseqqinnerusumik misissoreerneratigut siunnersuummut pioreersumut allannguutissanik siunnersuuteqartoqarnissaata pisariaqartinneqarnera ataatsimiititaliami isumaqatigiissutigineqarpoq.

Ataatsimiititaliap isumaqatigiittup allannguutissatut siunnersuut imaattoq saqqummiuppaa:

Nappaatit Kalaallit Nunaanni suliarineqarsinnaannginnerat pissutigalugu Brønshøjimi Peqqissartut Angerlarsimaffiani suliaritittussatut uninngasunut kalaaliminernik pisinissamut Nunatta Karsianit kr. 400.000-inik aningaasaliinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

Ataatsimiititaliap Naalakkersuisut imatut paasivai, Peqqinnissaqarfimmi killiliussat atuuttut naapertorlugit tamakkiisumik ilaannakortumilluunniit siunnersuummut aningaasaliisoqarsinnaanera periarfissaasoq.

Allannguutissatut siunnersuut AIS 2012-ip naammassillugu suliarineqannginnerani akuerineqassappat Ilaqutaiinnermut Peqqissutsimullu ataatsimiititaliaq Naalakkersuisunut kaammattuuteqarpoq Naalakkersuisut AIS 2012-mut allannguutissatut siunnersuusiussasut, taamaalilluni Inatsisartut aalajangiiffigisaat piaarnerpaamik atortussanngortinneqassammat. Taamaalisooqanngippat siunnersuut aatsaat 2013 aallarnerfigalugu atortuulersinneqarsinnaavoq.

Inassuteqaat**Ataatsimiititaliap isumaqatigiittup siunnersuut akuersissutigineqassasoq inassutigaa.**

Taamatut oqaaseqarluni Inatsisartuni Ilaqutariinnermullu Peqqissutsimullu ataatsimiititaliap siunnersuut Inatsisartuni suliareqqitassanngortippaa.

Olga P. Berthelsen,
Siulittaasoq

Debora Kleist

Isak Hammond

Astrid Fleischer Rex

Knud Kristiansen

Ruth Heilmann

Malik Berthselsen